



世之  
序  
無溟先生詩集序

世之立功名尚通顯者日譏薄文士無毛髮之用  
遂不知毛氏之學為何物其子墨客卿名能工比  
興者又往往目功名之士為俗吏謂惟韓陵一片  
石可共語爾能兼斯義者予友鯤溟先生其人歟  
先生與予為同學少年遂以意氣相許寧落落如  
石不能碌碌如玉所至以廉直惠愛稱而特耿介  
少所通徇不能容人之過其治官與治詩埒嘗曰  
近體為律夫律法也法家嚴而寡恩又於樂亦為  
律律亦樂法也其翕純皦繹秩然而不可亂也不



得所屬事而淺言之則陋得其所屬事而深言之則刻不究其所以比則淺一切究其所以比則鑿先生於詩慕稱風雅蘇李建安曹公父子蒐陶謝包齊梁至所攄寫又大半出元和長慶之體往往觸於境而之於情才足無憾於法多屈法而伸其才法不得盡於才多屈才而就法不務為刻鑿以求工於昔人之名諧宮中商經往緯隨縱吾偏至之鋒以挾其所由發之秘彬彬成一家言最為快矣先生由司理入銓曹式藩臬如鐘磬在懸動而有聲如刀劔發鎔試而輒利世不以是豔先生而

若惜其未盡用先生拂衣稅駕遂林泉之致逍遙觴詠者十餘年臺使部吏交馳於朝以薦而如弗聞也者世不以下壽豔先生而若惜其棄我以歿出為名宦入為鄉賢請從祀於郡之學宮世不以異典豔先生而猶若有歉者世或無以望見顏色而承下風然讀先生詩則宛然而附目鏗然而諧耳恍然其若有覲也先生言在人間興在霞表引海樂山之心思平慕泰之願鏘金叩求令人味繹不已非內無乏思外無遺物而能然耶先生所與倡酬者僅四五君子以予之不肖亦得從是四五

君子之後以倡酬於先生先生往往以詩投予蓋  
益數而後知先生之深於詩也先生既立功名致  
通顯又工比興稱子墨客卿茲有子為先生不朽  
計慨公業之猶存知荀令之不死矣是集也元美  
為之序述匠心之源其士安之託也夫存良為之  
校究作者之槩其鍾磬之品也夫予安能不攘臂  
其間請事斯役也

長洲張獻翼撰

鯤鯢

鯢鯢

鯢鯢

郭鯢溟先生詩集序

郭鯢溟先生始仕為袁司理即能出奇策以破散  
大奸慝天下聞而壯之既擢吏部郎數上書言事  
如裁有道擊中貴人阻抑僥倖平亭遷拜至請身  
以考功法試郡皆鑿鑿出人意表無不以為賈長  
沙陸敬輿復出而絳灌裴盧之徒不能無側目出  
叅江西省政先生飄然請告歸垂召用以病死天  
下無不高其行而惜其才之未盡究然未有能名  
先生詩者余與先生雖晚合傾蓋以來踰十五年  
杯酒之暇相與捉麈尾擊唾壺慷慨談說今古事

遠至八垠之外近而閭井瑣屑無所不及獨不及詩以爲先生豈厭薄之將以余非其人耶先生歿而其子元望出先生橐中詩可千餘首駭而讀之則自五七言古近體無所不有而近體尤富獨得十之八其辭咸調暢清麗句穩而字妥不露蹊徑而近體尤淪淪可咏以編少陵詩例考之則窮而詩達而詩遊息而詩感觸而詩適而詩拂鬱而詩爲賦爲興爲比不一而酬和贈祝餞之篇十不能二凡皆以自抒吐愉快其情意而已然後知世之不能名先生詩以少所見故見之未有不能名者

也嗟夫先生古遺直也直不可必達其志故在事之言可以致人忤而不顧其志不在名故有韻之言雖足以致人許而不肯出藉令果厭薄之則先生於居平時當焚筆研狗錐刀胡以若是其夥也夫余與先生交旣久雕蟲之聲頗墮人耳而不能以一語挑先生非望幾遂失先生嗟乎余果非其人也於是望將梓行之而屬余爲序或曰行之將非先生意乎哉望曰不然三百篇之什非明堂清廟而雅頌者往往出於畸人遊女之口太師采之聖人紀之以爲風而不敢廢春秋作羸氏失其官

而詩不在下當敬輿時重足無論矣以長沙之才其牢悵感慨豈僅賦鵬弔屈二章而竟寥寥乃耳要必有任其責者先大夫固不爲名計其於名當亦不在詩第奈何弁髦其平生之寄而棄焉姑請梓之天下大矣當必有心賞如鍾期者予曰善子姑梓之吾以爲中郎女猶賢於文園令婦也耶

弇州山人王世貞撰

鯤溟遺稿序

夫文者道之華也得於道者深則其發於文也粹文固難言哉鯤溟郭先生殆所稱有道者乎余幼嘗讀其制義聆其亮節竊嚮慕之旣涉蠡口溪水湯湯訪之里人稱其世所居處迨後與先生之弟締姻因得以悉其行藏而索遺稿讀之即未睹其全已不覺神色俱馳前輩風軌卓然道隱於菰蘆中者盈盈目睫矣今先生之孫際可收其詩稿選而葺之眎予讀竟迺益知先生之品格高標寓意特遠雖託篇什以宣洩性真之蘊非借幽棲以預

規篇什之傳也雖然其雄才灑氣震爍宇內而一朝投劾如棄敝屣焉以故蠡口得有先生先生亦常有蠡口矣當其時以其垂紳束帶者而供衫履以其黃扉紫府者而供巖壑以其珥筆阜囊者而供典墳以其天廚大官者而供筍蕨以其鳴珂駕騶者而供杖屨以其五雉九扈者而供園翁溪友以其柴柵纏繳者而供達生齊物之觀試讀其書想見其韻如隱居諸詩則彭澤歸去辭也歸與諸詠則季鷹思鱸意也家燕諸章則柴桑命子文也蠡溪諸什則香山池上篇也其性情發於歌咏而

風世之道寓焉其風猷著於疏奏而經世之略載焉夫滄浪之歌萍實之謠一言全道猶為垂訓况公此稿為精神心術之所蘊乎其道誼誠足鼎呂者而僅僅詩文云乎哉遂援筆為敘以識仰止之私云爾若夫揄揚贊歎之詞則有弇州諸先生在

太原王心一撰

補多云

接前易川

不必括

郭鯤溟先生詩集序

參政郭鯤溟先生蘇郡之典型也余奉

命來守茲郡其裔孫鸞以先生詩若干篇屬余爲之

序顧余非知詩者何足序先生詩然而先生之詩不可以不序也夫詩之爲道有從乎其詩者有從乎其人者從乎詩以言詩則備格律具聲調琢句脩詞以求相勝自漢魏以迄今茲苟有作者不可廢矣若從乎人以言詩則不必計其詩之工拙而但視其志之所在以爲足以千古此或詩或人得其一節而詩皆可以不朽如必人爲近世所希有



而詩亦當時所僅見若斯人者吾恐屈指數之古作者之林亦不數數覩也乃鯤溟先生獨能兼而有之觀其由司李歷部曹以至出爲參政其奮擊奸宄犯顏諫諍立大節於朝端彼專以詩名家者其何以及之及其見幾能作棄官如遺寄之於詩歌以發抒其懷抱又能絕去淫哇而一歸於大雅讀先生之詩者僅欲以廉吏名先生吾知其亦不可得也余雖不足序先生詩然以曾守先生之士得側聞其遺風而相資爲吏治且獲弁以數語與其詩共傳不朽焉是固余之幸也已至其詩之淵

源派別如何位置於詩林則王張諸先輩論之篤矣余無以易之歲在癸巳仲夏旣望長沙陳鵬年題於潤州城南寓舍

重刻郭鯤溟先生詩集序

余嘗考前明世宗時相嵩用事始末蓋三歎於鋤  
奸戢暴之綦難也嵩柄政二十餘年殺害忠良毒  
流宗社晚得徐文貞公密伺其隙潛為轉移林侍  
御既彈懋卿鄒侍御始彈世蕃而嵩乃罷歸田里  
猶縱逆孽蠢動不悛世宗隱懷護暱已非之意幾  
如反掌矣林侍御出按江右奸黨駸駸掎擊其後  
時則袁州司李郭公奮身力抗摘發嚴氏貪橫罪  
狀上諸侍御飛章入告然後得捕逮兇人授首梟  
街以成文貞公之志則公之功豈出侍御下哉嗚

呼元惡大慙神人憤恨而欲殛之者賴一二公忠  
剛正之臣衝其鋒摧其焰勢甚孤且危耳使所遇  
皆柔懦渙忍者流畏首畏尾莫之夾助必終被遏  
抑而事以無濟此我夫子所以太息於鄙夫之不  
可與事君也公子立豺虎之鄉迅擊鷹鷂之翼氣  
激風雷光貫日月矣及其入司銓曹正色昌言指  
陳時務糾劾中官侃侃見諸封事遂至直道齟齬  
出參外藩而公素懷恬退翩然解組優游林壑以  
終設使遭時大用得究其所設施豈不更有造於  
封疆多故廟堂否隔之時哉此尤足爲當時用人

者扼腕痛惜也公爲我鄉先正其風節卓犖不羣  
若此而時移代遷父老竟無稱述之者甚矣文獻  
之闕畧何可勝道今公之五世孫鸞重輯公之詩  
集新登梨棗因來問序於余余旣證諸舊聞展卷  
蕭焉起敬循環諷誦凡夫宦遊閑居之作雍容淡  
逸發於性情止乎理義颯颯乎大雅君子之音正  
宜表而出之以爲慶曆間藝林鼓吹不當遺置於  
殘編斷簡中也是集行而公之聲問昭揭如新清  
門世裔頌揚前芬致足嘉尚余雖衰疾不文敢不  
敬綴一詞且以寓論世之思焉

康熙五十二年八月秋分日同郡後學彭定求序

吾鄉先正郭鯤溟先生由袁州司李入為銓曹出  
參外藩其生平奮擊權貴立朝敢言棄官遠引迄  
今幾二百年邦人士猶能道之而其詩古文詞世  
罕有知之者如虞山錢宗伯牧齋輯列朝詩選備  
有明一代掌故而先生之詩不與焉後秀水朱檢  
討竹垞選明詩綜百卷蒐羅放失更備於錢而先  
生之詩卒未之及甚矣文獻之缺畧尚論者每有  
餘憾也先生五世孫鸞刻其詩集四卷問序於余  
余受而讀之詞氣和平無鑿刻蘄絕之語雖其與  
世齟齬不獲盡展抱負往往託諸歌詩以發之而

溫柔敦厚之旨自在因知先生之慷慨有爲得於粹養者深非逞其意氣漫焉嘗試者比也夫先生之赫赫不可蓋者本不以詩重即使其詩不傳或傳矣而不工於先生之高風峻節不以死生禍福爲芥蒂者固無損也況詩與人合當時聲雄壇坫者轉或遜之而謂不足以垂世而行遠歟世有好古之士搜勝國遺詩輯而錄之以補虞山秀水之闕亦後來者責也先生文章類多散佚今附詩集後者惟隆慶時應詔陳言及請治中官之疏其言皆切直不阿深知得失興壞盛衰之理爲人所不

能言不敢言者此益足以見先生之大也余與郭爲中表世戚又先民典型爲後學模楷不獲以不文辭故綴一言於末以志高山仰止之意至其殲分宜嚴氏之惡與夫得罪江陵之故爲大節之顯然者王文肅公及王弇洲司寇傳序中詳言之不復贅述云

康熙癸巳冬日同郡後學尤珍序

鄉先生鯤溟郭公初筮仕爲袁州理官會嚴氏新  
敗世蕃不之戍所爲橫於鄉如平時公盡廉得其  
不道狀南京御史林潤以聞卒論如法能使萬物  
吐氣至今婦孺猶道公之名氏余初意公爲人發  
姦摧豪峭特敢決殆趙子都朱子元之流及從其  
後人得公穆宗初元爲吏部屬應詔陳言皆務引  
大體疎暢洞達有儒先君子之風乃知公所蘊弘  
遠非僅意氣激發快一時之人心者也旣而其五  
世孫鸞重刻公詩集四卷間以見遺一再尋諷則  
近體尤和平溫厚得大曆貞元韻味爲多同時朝

士有詩聲者或未之能先益信公陶冶性靈故有  
和粹之積焉若厲威嚴逞鋒銳則淺丈夫末事而  
豈足以知公哉漢宣帝有言今吏或以不禁奸邪  
爲寬大縱釋有罪爲不苛或以酷惡爲賢皆失其  
中公旣爲表理官表事之宜問孰有大且先於世  
蕃者殲一方之大慙申廟堂之佚罰俾母至於失  
中誦其詩以知其人適無改於平日之和平溫厚  
而已然後之居政府者遂以此嘆公謂其不務優  
假退輔立朝必將唯敵是求而中人亦惡之萬曆  
甲戌公爲考功郎不滿百日江陵遂出公爲江西

參政公亦引疾遄歸不復展所蘊矣公之卒以庚  
辰越二年而江陵沒於位言者追論之其得禍幾  
與分宜並向使江陵之爲相也能容如公者蹇蹇  
與爭得失可否則有所顧藉可以無敗即身沒勢  
移猶有如公之平心得中者別白生平功罪其禍  
當不至若是酷也亦何事預爲排翦而傾軋反出  
所備之外哉吾又因誦公之詩而不能不三歎於  
後事者也公生平文多散佚其應詔陳言及請治  
中官二疏即附見詩集之後吾黨小子庶皆因之  
而有所興起云康熙癸巳秋日後學義門何焯謹

書

鯤溟系傳

江西

鯤溟系傳

江西參政郭公者嶠然表世人也郭公諫臣名子忠用字唯志之旌故稱諸宦焉曰鯤溟亦唯志之旌故郭公蓋起吳中德素家其家當蘇長洲其北野實蠡口蠡口之郭世則力田焉亦克力於孝弟德以聞在公王父璇德數世矣弗其懈也時感異夢而生堂堂德滋樹滋有遠焉施時乃生公公貴而堂用封封吏部稽勲郎乃死公生而具雋學而敦書比為諸生諸生弱焉唯其書於是公初十五年矣譽咄咄遽突又十五年礪而須以書書譽竟

另頁



則大越也亦弗第公乃北而遊遊於京師於太學  
曰余何邇志之有余姑覲才乎才莫藪於大學矣  
厥既覲大學之人儉然曹自弱也而勅旃嘉靖辛  
酉公從京師舉壬戌第第年試服推官江西袁州  
府袁良郡也而官去其政由嚴相嵩實然相嵩當  
國鷲而蠱子世蕃狼而蝮其家在袁凡袁在位皆  
嚴役也不役不位袁民是以大不賴於政刑及公  
官袁相嵩既罪替而無替威也世蕃罪戍亦無戍  
也無日不在位役焉以所欲政刑戍不成不舍公  
怒曰孰戍而敢然乎余官理刑刑焉避是避是而

官余死弗能矣公於是始事嚴氏理嚴氏不受乃  
唯多辜亡聚多銛組鉞甲藏多刺客多流言戰疑  
於公側於出入行所塗日新公曰呼逸磔余豈死  
回余亦豈無天公又曰余可死是不可逸也逸將  
禍國寧禍余乙丑冬公乃盡徵嚴氏姦逆不道所  
因御史林潤列上肅皇帝天怒乃震乃遽發命乃  
大討於嚴氏世蕃磔死狗孛具戍家籍逋而從食  
而逢狡鬪而寵功者罪小大新故以戮朝廷於是  
乎有刑天子於是乎稱聖明袁方之民老幼男女  
於是乎既喜而泣愬其昔所未死也而慶其今以

生凡則公之力也丙寅春召公官吏部官主事驗封司唯其才也亦曰唯其功冢宰楊襄毅公見公而喜曰吏部今乃有郎既退部諸郎無敢年位以公齒楊公又稱之驟曰朝廷乃今得士朝士亦無敢以齒是歲冬轉主事考功厥明丁卯莊皇帝隆慶元年月正其肫詔唯羣臣直言求公言請芟侈封濫祿於張真人又請割世胄於恩澤侯伯又請達喪禮於衍聖公必鈞其言危危其事用而弗云既其義熒如矯如秋轉文選戊辰春遷稽勲員外郎其夏中官許義等毆御史闕下莫之討也亦莫

之敢以言公愾而起謂其寮曰曩者之難今又難焉其寮曰何謂也公曰椽人不君君矣不是戮也朝廷將卑卑朝廷余不忍死余余不憾余死椽人乎遂疏請施中官施不敬唯律中官聞之怖而相尤又相泣也曰吾儕猶及死乎而及改諸乎郭吏部無乃嚴氏我其言徹上故紓中官戮而心獨貴公忠冬十月轉考功既公居則心動動日再三公告其人且曰余壹不知是何異也豈吾親有未安乎吾親老矣余不能以一日忍是故忽而請告歸歸至封稽勲公病乃亦遷月公自痛曰余既多曠

於養哉余猶敢言子已復曰余幸而有天天實歸  
我則瞿瞿焉湯藥於蚤夜衣弗帶弛於十旬已已  
春二月稽勲公竟卒公哀則鮮粒骨存焉猶舍梁  
肉辛未二月母奚宜人又卒公毀焉遂疾疾歲而  
瘳萬曆元年癸酉夏公免喪矣今皇帝復官名焉  
官復郎中吏部驗封司冬轉考功甲戌春出爲江  
西布政司右叅政專嶺北疆守是則忌公者爲之  
曰彼強直已甚言則敵求彼安可使久於朝公在  
嶺北三月曰歸乎歸乎余羸老矣飽臥淮陽欲何  
爲於是乎反之政焉而自廢於田其廢野服而新

詩畊樵錯而魚鳥求也曰余樂此余不知余所死  
年矣及聞民有所苦政農有苦於時其不幾曰自  
生也公又快然出而言之官而遂生之曰余姑以  
余餘生德於鄉之人丁丑公有疾已卯又疾在疾  
無客謝也亦無談詠荒庚辰疾乃漸七月朔卒卒  
時猶對客視日景問曰時午乎遽而坐暝年五十  
有七公生唯義狗不義事亦弗可使聞於公聞於  
公則恨不當其時假之手故公出而求死君焉居  
而唯其九族懷唯昆弟之孤嫠是恤唯宗姻之婚  
嫁弗獲其時及是舉曰吾無敢專享祖考之成施

亦唯師唯友。厥或死而無歸乎？曰：於我乎？殞於我乎？葬吾無敢忘仲尼之德履。公於為義若旨，貪焉懼其不足也。而勿使有餘之遺矣。公詩文富，行世號舉諸曰：鯤溟集子、元禹、元夔、元尹、元衡、元望、幼長、咸德，又甚文英，英有父風。

太史公曰：有心哉乎！郭公除君之姦，唯力是視。郭公則謂矣：郭公何心？君以為心，是以不難險試。厥身者也。夫仲尼曰：仁者必有勇，吾於郭公益信。

年弟王錫爵頓首拜撰

稿上寫

叅政郭先生傳

余髮未總角，便耳熱先生名，稍長讀先生文。厥後與先生季弟締禱，而益習先生之為人。先生蓋嶠然表世人乎？先生名諫，臣子忠字鯤溟，其別號也。家於茂苑北之蠡口，於是蘇民羣相傳曰：蠡口郭云，世力田亦克力於孝弟。其先王父璇，德滋樹，感異夢而生，堂堂即先生。大父封稽勲公也。先生生而穎異，舞象時里中無任為句讀師者，弱冠為諸生下帷，勵精尤邃於易理，數應試，不利益博綜六經子史，以及前代興衰理亂人物臧否政事醇疵。

蓋有心維世之學也抱材弗售乃北而游游太學見賞於大司成高文莊公稱爲有用實學辛酉舉順天鄉試明年試春官皆掇高等成進士得袁州司李袁故良郡也而官失政維時蓋由分宜相云分宜子貪黷而蝮凡官袁者輒撓其法袁民以故大不賴於政刑先生於是懼然曰吾爲理官奉三尺有奸如山畏不問是無三尺也乃羅列其姦逆不道事因御史以聞肅皇帝震怒籍按分宜家子棄市時論大快先生直聲著天下當事者召先生入居吏部主事驗封將大用也維時冢宰蒲州公

見而亟稱曰吏部今有郎矣大相器重未幾轉考功再轉文選丁卯穆廟登極詔求直言先生不居言職而在官言官首請芟張真人濫秩請停恩澤侯伯世襲請正衍聖公終喪禮請抑雜流位卿貳請久任藩臬郡縣其言皆切實而多見採用尋轉文選明年遷稽勲員外郎會中官毆御史闕下莫之櫻也亦莫之敢言先生獨抗章請竟其獄至今讀先生疏猶凜凜有生氣會稽勲公病請告歸連丁外內艱癸酉免喪神廟初政復官驗封冬轉考功郎中而嗾先生者出爲江西叅政專嶺北疆守

閱三月而拂袖言歸矣先生性強直敢言至訶詆  
尊貴人不少遜以是忤於時故所居官不過三品  
立朝不踰四年其在藩臬不三月去一去而不復  
召齋志以歿余所以重先生之才壯先生之志深  
悲先生之不盡用而因以悼余之有類於先生也  
余才不逮先生什九而強直敢言之氣與先生等  
故亦不爲時所容先生易箒之日召諸子謂之曰  
爾不逮乃執其季弟世臣手曰吾身後事賴有汝  
耳吾可以瞑遊矣厥後先生之弟雖未登甲榜而  
宦蹟家聲堪埒厥兄先生之先見也夫大約先生

之爲人明於識人敢於任事強於擊姦而勇於赴  
義有不義事則願以身殉匪第形於色已也家居  
而懷宗族恤孤嫠施鄰黨贍友生樹德若飴之甘  
焉懼其不足而勿使有餘之遺故今子姓蕃而克  
大其宗其英英玉立者悉嶷然有先生風至於詩  
詞余不概見則余甥永昌能誦之矣

太史公曰仁人何心君以爲心惟其心不忘君是  
以不難險試其身出爾戮力入爾抒忱傳舍而李  
銓藩而心惟叅厥君則郭公之謂也夫如其仁如  
仁

賜進士及第奉直大夫左春坊左諭德前侍讀翰林院編修兼理誥勅纂修國史出使高麗欽賜一品服眷晚生顧天峻撰

鯤溟先生詩集目錄

卷第一

一百四十二首

卷第二

一百五十首

卷第三

一百七十九首

卷第四

一百八十三首

失編

十七首

奏疏二

欽定

○銀溪系一

明○郭諫臣○核○○

○○題目

鯤溟先生詩集卷一

吳郡郭諫臣子忠著

甥韓世能

男元夔

全校

五世孫 鸞重刊

春日遊天池山和天水胡公韻

天半孤峰削出奇  
蓮花倒影入天池  
晴雲暖護池邊竹  
芳草春深石上碑  
霞彩盪空山欲動  
松陰滿地日初移  
仙源坐久渾忘倦  
莫怪遊人歸去遲

長蕩舟行

蘆葦煙消兩岸青  
湖光浩蕩水雲平  
晴波遠弄青



山色綠柳新添黃鳥聲濁酒貫來綠有約殘英落  
盡自無情西山此去偏多興薇蕨離離遶澗生  
送從兄宗義戍龍里

萬水千山行路難落花啼鳥靜中看長途有客頻  
回首故國無人獨倚闌荒戍城邊騏驥老夕陽江  
上鵲鴿寒白雲南去蠻鄉近笑倚吳鉤天地寬

仲夏寄覺海玘公

不見旻公久時時憶草堂修篁環徑密幽草徧山  
長絕壁雲疑墮奔流水自忙依依舊遊處相約在  
重陽

英氣歌

男兒挺生天地間英雄激烈如丘山養育成就在  
磨礪間關百折胡厚顏巾幗之遺不足恥綠林之  
輩不足死會須一忍在萬全方是英雄好男子君  
不見應侯昔為魏相容青蠅白壁遭讒賊拉脅折  
齒佯死餘使車猥載來秦國立談勇畧萬乘傾相  
權赫赫諸侯驚仇人亡命終授首故人聊惜綈袍  
情又不見王孫昔日未遇時淮陰年少爭相欺俛  
首俯伏出胯下一市嗤笑無能為誰知事漢擒楚  
猴油幢虎帳臨淮流百辱仍將中尉報一飯豈惜

千金酬丈夫，落落心千古。悻悻小輩，何足數。乃知能屈始能伸，古來如此非獨我。

春日山房有客過訪，因留宿別。

芳林日出翠煙消，無限春心寄柳條。紅雨池塘遊蝶醉，綠陰庭院語鶯嬌。半牕殘月論文夜，一枕微醺中酒朝。感爾相過又相別，青青酒旆映河橋。

春日睡起

杏花庭院晝遲遲，睡起初驚燕語時。遍倚曲闌無限思，游絲閑駐海棠枝。

雨中新柳

弱柳絲絲帶雨垂，隔牕淡掃素娥眉。等閑莫向河橋折，一縷常懸萬里思。

想山中新茶

酒渴時思茗一杯，玉川風味許相陪。金芽欲吐無消息，驚破江南昨夜雷。

山窗雨夜話舊

不到西山久，空門閉綠苔。喜從燈下語，疑是夢中來。舊雨三年別，新詩五夜裁。老僧新釀熟，對客一尊開。

春日訪友雪阻不果

故人連臥病久不共高歌欲訪寒梅信其如雨雪  
何蹇驢無處覓短檝數能過試檢吟囊裏新詩積  
幾多

春日與客同飲江亭

春風攜客上江亭萬頃波光洗眼明雲樹遙從天  
外落風帆如在鏡中行夜深不厭頻催句興到還  
應數舉觥指點蓬瀛那可見掀髯長嘯大江橫

飛絮詞

楊花如雪舞晴空飄泊隨風恰似儂願化浮萍逐  
流水與君千里或相逢

天街步月口占

天街露冷思難禁對月空懸萬里心故國此時方  
搗練滿庭梧影夜深沉

睡起

客舍蕭條日正長綠牕夢破黃鸝語分明身在故  
鄉遊枕上思親淚如雨

自儀真舟行大江

水拍春空一鏡明畫船風捲片帆輕金山雲護江  
心寺鐵瓮天低京口城兩岸樹搖煙浪闊中流日  
照海潮平晚來忽聽傳呼語知有江南津吏迎

夜抵九江

譙鼓已三更孤舟載月明風霜千里客星漢九江  
城水淨飛帆影天空落鴈聲暗思高臥者潦倒夢  
初驚

早春日新喻道中

雨洗川原一望新宦遊風物易傷神閑花似笑忙  
歸客新燕還尋舊主人遠樹妝成天外景飛花疏  
出洞中春滿懷佳况應難遣典却春衣莫論貧

山中聞子規

草深山徑馬行遲兩岸豐林叫子規行客驟聞心

獨慘無端忽起故園思

永新道中

亂山高下幾重重歷徧巉巖出險中平地起雲疑  
是嶂夕陽射雨漸成虹飛泉百道奔寒澗高塔千  
尋插遠空堪歎薄遊無定跡馬蹄終日自西東

送別故友歸吳中

童稚論交三十年君今落魄困儒冠薄遊空慕林  
宗義逆旅誰知范叔寒江闊孤舟行樹杪天空一  
雁落雲端相逢不久又相別今夜月明何處看

正月十一途中念家君初度偶成

宦遊終日馬蹄忙  
偶見梅花憶故鄉  
春酒熟時歸未得  
一樽誰與進高堂

舟中曉起

兩岸桃花夾水流  
一樽時醉木蘭舟  
多情最是春夢夜  
夜夜遙從故國遊

新月

新月如弓曲未平  
清光照我入孤城  
當空桂影渾疑見  
繞路松陰解送行  
三五漸從今夜滿  
尋常還是故鄉明  
無端忽被微雲掩  
誰識嫦娥一片情

瑞州公館月夜有懷

柳梢新月照孤城  
花氣薰人入夜清  
遙想閨中春寂寞  
有人對月漫含情

登廬山凌虛閣

高閣玲瓏倚太虛  
恍然身若在蓬壺  
開牕夜欲捫牛斗  
俯檻時看走兔烏  
林外天花凝寶樹  
簷前仙靄擁香爐  
憑高極目秋天遠  
漢水湘山半有無

九日江州諸公相約登高不果

木落天高秋氣清  
黃花開滿九江城  
無緣得遂登高興  
空負江州刺史情

樂平道中秋晚

長髮蕭蕭  
些原孝与首  
平字

山行林末見殘曛暝色催人漸不分幾點亂鴉歸  
暮堞一行征鴈叫秋雲煙高野燒連空起風急樵  
歌隔隴聞終日馳驅車馬道薄遊多愧北山文

自樂平過德興縣道經梅巖洞停輿入遊內  
有龍耳臥龜石鹿石燕仙田覆船諸物因賦  
二律

山行逢野叟引我入仙源龍耳浮雲氣龜文雜蘚  
痕闢來多歲月別置一乾坤去後重回首煙霞鎖  
洞門

紆曲空山道深藏古洞天鶴巢千歲樹龍滴四時

泉無復燒丹竈空餘種玉田掛冠來此隱儘可學  
延年

鄱湖舟中翫月

千里鄱湖一櫂過冰輪倒影湧金波客中對景生  
佳况醉後臨流發浩歌坐愛清輝浮玉宇遙看素  
練引銀河廣寒夜靜無人到辜負嬋娟奈爾何

春日分宜縣喜遇楊少府南歸

去值潯陽月歸當秀水春相看今日面猶是隔年  
人高閣聊同眺清尊不厭頻別離情萬種驚見二  
毛新

七夕舟次楊村

燕闕天高暮雨收，青錢沽酒醉蘭舟。  
蓼花曲岸迴殘照，禾黍西風動早秋。  
三載空成南國夢，一官還向上林游。  
遙思今夜吳門月，幾處穿針閱女牛。

九日同省中諸友遊天壇道院

雨餘秋色滿金臺，九日聊因選勝來。  
紫陌馬行苔徑滑，仙源犬吠竹門開。  
登高幾負茱萸約，對客頻傾竹葉杯。  
旣醉迴瞻天闕近，九重佳氣鬱三台。

天街月夜

天街月色似中秋，水接長空上下浮。  
遙憶故園那

可見一聲寒鴈過南樓

雨後自都門赴昌平途中覽勝漫賦

秋郊晨出雨初晴，馬首燕山入漢清。  
紫塞北臨千里虜，玉河南遶九重城。  
漢家陵寢風雲護，昭代山河日月明。  
晚向昌平一回首，騰騰王氣擁神京。

晚發昌平望京師

祀罷諸陵逐曉回，遙瞻旭日照金臺。  
香輪旋輾平沙軟，仙旆晴披宿霧開。  
秋色先從邊塞老，山光還遶帝城來。  
一官願效山公啓，三賦慚非杜甫才。

省中秋晚即事

斜日薄西山幽齋夢初醒窗虛隙照明室靜爐煙  
冷老圃帶秋容疎林淹暮景省中出每遲松落空  
階影

送辛黃二民部同年奉使江浙監兌

朝罷金門夜已闌行行使節向江干身離禁苑香  
初散手捧天書墨未乾明月孤舟人竝往福星一  
路衆爭看東南民力君知否好爲蒼生著意寬

早春日朝賀穆宗即位

王氣細縕照紫薇明堂重見漢官儀雲移仙仗趨  
丹陛風送爐香下玉墀日色旋臨鳩鵲觀春光先

到鳳凰池太平天子開新曆應遣皇華四牡馳

春晚省中書感簡許司封同年

東風撲面動微和春服初成試越羅城背暖消殘  
雪盡林梢晴帶夕陽多眼前物態看來變鏡裏光  
陰老去何肯謝榮名似君少扁舟湖上傲煙波

與銓省諸公觀漱玉泉流觴酣飲

四山環列翠雲屏坐對清泉醉欲醒詩就香山追  
洛社觴飛曲水續蘭亭仙源畫永花逾白輦路春  
深草自青盛世風光莫虛度閑中華髮漸星星

觀永陵工作



新作陵園枕薊門衆山來勢自崑崙也知月窟羣  
龍偃驚見天衢萬馬奔王氣騰霄微復見峯嵐映  
日吐還吞司空欲做前朝制光武遺謀今尚存

春日左闕門宴罷閒坐掖舍即事

宴罷宮門午漏遲掖垣花發萬年枝晴牕燕語黃  
金屋春水鷗眠碧玉池麗日光輝薰細草東風無  
力曳游絲微臣幸際清平世願播陽和及海涯

春日恭送世宗梓宮赴山陵

帝子乘龍去鼎湖空餘仙馭出皇都沙堤雨灑千  
官淚松壑風傳萬姓呼徒有燕姬悲甲館恨無方

朔問蓬壺追思四十年來事只少東封按赤符

自都門北望永陵有感

破曉辭金殿衝寒出玉京中天日漸午西嶺雪初  
晴雲護園陵迴沙鋪輦路平先朝舊臣子哀感不  
勝情

昌平州道中

歲晚昌平道肩輿百里程天臨赤縣近雪擁玉河  
平紫塞燕山路黃花漢將營壯哉此形勝坐遣萬  
方清

曉發昌平州

州據西山勝門臨北闕尊關河千里鎮煙火萬家  
邨積雪容猶慘初陽景漸溫平生請纓志還擬扣  
天闈

端陽前一日省中即事

梅天雨初霽煙景尚依稀曲檻搖新綠高簷送落  
暉吏從宮漏散鳥向御林歸來日滄江上龍舟競  
欲飛

端陽後一日同省中諸丈遊陳戚畹別墅

自憐詩骨懶朝參乞假登臨喜盍簪綠樹團陰多  
映水青山入曉半浮嵐坐中冠蓋人爭羨物外煙

霞性所耽對景渾忘身是客依稀風物似江南

喜甥韓進士存良入館選

郎君早歲即知名十載風塵祗自驚綵筆昔看稱  
獨步玉堂今喜冠羣英九重天向詞壇近五色雲  
從相國生少小同遊幸同宦一緘聊展渭陽情

夏日同省中諸丈遊鄭氏山莊

谷口人何在空餘別業存幽牕多鳥跡芳徑半苔  
痕掃石供棋局催花送酒樽投閒此佳會暫遠市  
朝喧

贈別王工部年丈改授南曹

送君南去鳳凰臺江上秋風待客來雲樹暮連青  
嶂遠渚花寒映錦帆開六朝舊蹟千年在萬里長  
江一帶迴莫謂留都近閑散先皇曾此屈羣材

秋晚有懷吳中故人

向晚長安道秋風思故人十年雞肋味終日馬蹄  
塵目送天邊鳥心懸湖上尊山中舊相識安得更  
相親

茅山道中喜晴

積雨初收曙色分三山如畫斂輕雲花殘紫陌聞  
鶯語草長青郊走鹿羣本擬登臨同謝傅還期齋

宿禮茅君華陽洞口神仙宅霞彩常成五色文

七夕

今夕何夕火西流處處穿針閱女牛銀燭光搖書  
幌冷碧梧影落帝城秋疎愚欲乞天孫巧迂遠空  
懷杞國憂坐久宴然清不寐絳河如練近南樓

過徐相國舊宅有感

相國門前鞍馬稀古槐斜帶夕陽微蟬聲滿樹秋  
風早寂寞朱簾燕雀飛

贈別李侍御謫廬州

漢世風裁說李膺看花曾伴曲江行一朝誤落城

狐計千古應傳驄馬名  
淮海秋添遷客思  
廬江水似使君清  
休因去國違初志  
天子垂衣本聖明

秋日都門送別有感

為送南歸客  
翻憐北駐人  
白雲凝望遠  
華髮共愁新  
落日湖南橘  
秋風江上尊  
何時返初服  
吾亦任吾真

送董太僕歸省華亭

十年抗節戍蠻荒  
仗劔歸來鬢未蒼  
赤膽朝天時共矚  
錦衣歸晝里生光  
秋高淮海鴻飛遠  
月滿華亭鶴唳長  
知向故園晨省處  
好將菜綵慰高堂

重陽日與諸省丈都門晚集

帝里逢佳節  
冠裳續勝遊  
登高千古事  
清賞片時秋  
雨後金英綻  
杯中玉液浮  
醉餘扶上馬  
明月在簾鉤

月夜醉歸漫興

雨過天街夜氣清  
醉看明月逐人行  
更傳宮闕銅壺漏  
風送關山玉笛聲  
逆旅長年淹宦跡  
故鄉終日計歸程  
扁舟未遂江湖興  
尊菜鱸魚空復情

潞河舟中夜坐二首

夜泊潞河驛  
朔風時送寒  
濤聲走沙磧  
月色映江

干獨酌意何遠高吟興未闌南歸歲云暮白髮擬承歡

暫解朝簪去還乘官舫行長風催客去孤月向人明行跡隨蓬轉歸心逐鴈征皇恩容乞假無復用陳情

楊村夜泊

維舟楊柳渡沙白亘長天犬吠孤村月鳥啼落木煙微名真物外清賞足樽前秉燭還深坐宵分尚未眠

曉發天津舟中有感

篷牕簾影弄朝暉晨起遲遲懶著衣老去不知筋力改閒來時覺鬢毛稀望中煙樹鄉心遠到處風波宦况微擬向五湖尋舊業蕭然松竹待人歸

靜海道中晚眺

向晚滄洲道舟行落照邊殘霞寒映水衰柳暮連天風靜布帆捲潮平錦纜牽客途可乘興沽酒用青錢

流河道中阻風

阻風蘆葦岸獨坐自通宵沙近寒聞鴈溪深夜落潮林昏煙景翳波湧月光搖客路瀕危險令人魂

暗消

晚發興濟縣

蘭舟經海縣薄暮喜微風  
草帶寒煙白川迎落照  
紅殘雲歸遠戍孤鳥沒  
晴空無限東歸思憑欄一  
望中

夜泊安林

路出安林晚煙生野渡昏  
挑燈拈彩筆待月舉蘭  
樽帙散蠹魚走船驚宿鷺  
喧客心歸轉急飛夢到  
家園

德州夜坐達旦

倚櫂雄州夜欲闌燈前重整鷓鴣冠  
星垂碧落懸珠綴月委澄波走玉盤  
雞唱忽傳更漏盡烏啼驚拂曉霜寒  
客心日夜東歸急對景翻嫌行路難

武城懷古

昔賢曾試宰茲地尚絃歌俗帶遺風  
古城臨流水多琴堂虛夜月祠屋長  
春蘿未暇薦蘋藻其如仰止何

臨清晚眺

地據京南勝州臨濟北雄河山齊魯  
舊風俗古今同煙柳連天碧霜楓夾  
岸紅到來維短櫂沽酒夕

陽中

開河驛夜坐

秋深仗劔出京華此夕經行汶水涯柳下酒香停  
客權渡頭燈白近漁家天高風送溪聲遠夜久簾  
垂月影斜醉後欲眠還起坐忍聽哀雁落寒沙

舟中夜雨

輕舟依野渡短褐坐深更千里鄉關思孤燈夜雨  
聲酒衝愁未散詩與夢俱清翻憶朝參日泥塗倩  
馬行

留城懷古

夜泊古留城河流接漢清昔人不可作茲地只留  
名祠帶寒煙色庭多落葉聲功成輕萬戶千載仰  
高情

阻淺境山夜坐

百里彭城道舟行滯淺沙波涵珠斗動樹帶絳河  
斜興到杯浮白更深燭吐花歸途已過半潦倒憶  
京華

暮抵境山

風帆飛驛路野燒動寒原霧翳林光黑煙籠水氣  
昏遠天收落景新月露微痕沙岸停橈處時聞雞

犬喧

曉發徐州

曉發彭城驛舟迎水拍隄天連淮樹遠帆拂楚雲  
低鴈向平沙起雞從夾岸啼江鄉行漸遠雅思欲  
幽棲

經韓信舊城

淮陰城久廢千載憶王孫古木愁雲起荒原落日  
昏路埋荆棘底碑雜蘚苔痕一飯曾圖報能忘返  
哺恩

夜抵江都

路入維揚郡江空星漢遙漁邨寒映火荻岸夜聞  
潮雲斂瓜洲樹月明揚子橋自來歌舞地無復似  
前朝

自江都晚抵儀真

孤槎薄暮向江城千里江流一鏡平沙岸樹搖寒  
月影蓬牕風送夜濤聲坐翻芸葉移時久閒剪燈  
花達曙明三載離鄉今漸邇漫勞終日計歸程

江上阻風口占

東風吹浪拍船頭江上寒雲繫客愁路近家山歸  
未得夢魂先已到長洲



早行渡江

畫舸風生錦纜開  
江光遙向日邊來  
煙消遠岸漁歌起  
水浸長天鴈影迴  
滄海潮平沒洲渚  
金山雲出護樓臺  
南來風景依然在  
祇歎年華鏡裏催

嘉禾道中

篷牕隱几夢初殘  
座上青山帶雨看  
幾處葦塘鳴翡翠  
誰家竹塢長琅玕  
煙林日落千村暮  
水國風生五月寒  
強欲披裘任疎懶  
扁舟長往弄漁竿

舟次鳳凰山對月有感

鳳凰山下繫孤舟  
坐愛冰輪湧碧流  
雨過柳塘涼

入夜風生荻渚景  
疑秋鬢華老去知  
難再心赤年來愧  
未酬十載風霜淹  
宦轍淒涼風木使  
人愁

月夜飲養翁相公山館

黃閣辭榮早青山  
結社新不嫌車馬  
寂轉與鹿麋親入  
戶雲千頃開牕月  
一輪蘭樽頻勸飲  
吐握意何真

月夜泊千墩

楊柳洲邊夜泊船  
月光如水散青天  
江村潮長諸溪滿  
林壑風生萬籟傳  
桑落杯乾猶強坐  
梅花帳冷不成眠  
良宵如此成虛度  
獨向篷牕檢舊編

舟行三江口占

萬頃滄浪映遠空，布帆斜掛夕陽紅。  
秋來每動江湖興，擬著荷衣伴釣翁。

華蕩晚渡

湖上冥冥落景催，沙明石淨水縈洄。  
殘霞飛映漁舟小，蘆荻花中蕩槳來。

竹梧書舍曉起

紅日三竿睡起遲，幽棲原與性相宜。  
滿庭落葉秋深後，遶屋寒花興到時。  
短褐漫同逋客散，濁醪擬赴野人期。  
一辭京國歸桑梓，理亂經年總不知。

夜泊方橋

橋偃秋波闊，舟依夕岸斜。  
香杭搗村杵，亂竹護漁家。  
霜後楓酣葉，樽前燭吐花。  
江湖足乘興，無復憶京華。

曉發梁谿

曉來風雨暗梁谿，客子舟行路欲迷。  
蘆岸近沙頻下鴈，漁村隔水遠聞雞。  
蕭蕭落木連天暝，渺渺寒煙拂地低。  
自笑百年渾似寄，萍蹤一任自東西。

舟中苦雨

水國偏多雨，篷牕日日陰。  
江聲隨白浪，煙景翳青

林漁父茅茨濕鮫人窟宅深豐凶關國計對此獨  
沉吟

曉發齋子浦

策馬微行白下過歡迎無奈故人何玉堂學士風  
流劇蘭省仙郎逸興多千炬高懸明月夜一樽同  
醉白雲阿別來幾度思君處閒對澄江發浩歌

寒食早行嘉禾道中

半牕殘月送雞聲畫舸輕帆趁曉行楊柳溪橋煙  
未散杏花邨落雨初晴路逢寒食成虛度坐對春  
山憶舊盟自笑狂夫真潦倒每因風物倍多情

長橋月夜

江城暮雨歇與客坐孤舟月照蘭樽夜風生荻岸  
秋空懷千古事因羨五湖遊烈士今何在長橋水  
自流

夏日訪舊過太倉舟中對月獨酌

蘭舟載琴鶴遠赴故人期碧海潮來疾青天月到  
遲波光簾外動樹影座間移獨酌娛清夜寧愁鬢  
欲絲

送王司業同年北上三絕

江上西風動客旌故人相對眼俱青一杯贈別休

辭醉世路於今畏獨醒

望中秋色滿吳鄉君去燕雲路渺茫別後倘承宣  
室問好將民困達君王

雨過江城白苧秋行看仙客赴瀛洲平津延納君  
侯事不似相如已倦遊

雨後獨坐漫興二絕

西風吹雨動微寒隱几香消午夢殘聞說江湖可  
乘興扁舟散髮弄漁竿

修竹千竿滿架書山窗無事稱閒居由他世路風  
波惡獨掩柴扉日晏如

晚過楓橋

落日楓橋路船窗暮雨昏秋萍擁沙觜霜葉墜籬  
根山寺炊煙起江邨宿鳥喧臨風思往事獨坐暗  
消魂

秋日閒居書感

柴扉終日掩苔徑少人過中夜涼風發空階落葉  
多感時休浩歎對酒且高歌百歲浮生計渾如一  
擲梭

舟過胥門書感

旭日晴堪愛寒山青不收城臨伍相廟水落百花

洲恥作依人鳥甘為浪跡鷗有懷千古恨空羨五湖遊

晚過華蕩

歲晚江鄉路風生盡鷁輕坐看山色遠行愛練光明落日孤帆影寒沙一鴈聲歸途趁明月不必憚宵征

太宜人臥病兼程夜歸

何事促歸心孤舟入夜深霜飛北堂冷日薄西山陰坐久時長嘯愁來還獨吟每思斷機訓不覺淚沾襟

平望阻風

風色晚來靜湖光時漸嘉遠山銜落日隔水映殘霞驛路船爭聚江橋酒易賒漁樵堪白首空復戀京華

暮雪

江天日暮雪漫漫四野風生玉宇寒幾處柴門煙火寂有人僵臥似袁安

雪後

雪後山川景倍嘉東郊初日弄煙霞幽人策蹇來相訪為道寒梅已放花

春日與諸親友同過靈殿寺觀梅

古寺梅花發開樽引興長  
賓朋盡嵇阮臺殿自齊  
梁疎影虛禪榻清芬洒  
客裳數杯沉醉後渾欲  
泛慈航

落梅

二月江村見落梅風飄  
花瓣玉成堆無端醉臥  
山牕下時有香魂入夢  
來

春日閒居方子靜過訪

夫君久約在梅花過訪  
茅堂日未斜野店柳長  
懸酒旆水邨船泊近漁  
家十年親舊渾如故一  
旦歡

迎興未賒少壯同遊今  
皓首忍將衰鬢客天涯

江邨春暮

三月江邨路韶華已暮  
春水光晴弄日花氣暖  
宜人燕啄香芹去魚翻  
碧藻新聞居與花鳥日  
日自相親

嘗新茶

雷震山原百草長金芽  
摘得未盈筐牕前鼎沸  
松風暖座上杯浮穀雨  
香對案總堪清客夢入  
脣猶足沁詩腸九重聞  
為求賢渴應擬星馳達  
上方

春日方司訓過訪

故人頻枉駕相對意俱忘  
門掩青春暮庭閒白晝  
長日蒸花氣重風落燕泥香  
更擬通宵飲陶然入  
醉鄉

春朝即事

為愛連宵月朝來起較遲  
呼童煮新茗對客了殘  
棋花落清明後鳩鳴穀雨時  
初歸雙燕子似與主人期

晚過陽城湖

放櫂過湖曲波淹落照紅  
柳煙低度水麥浪遠搖  
空暝色孤蓬底閒情一望  
中舟行時遣興沽酒問

漁翁

端陽日對雨小坐

江郭逢端午軒牕風雨涼  
呼童收藥裹與客醉蒲  
觴入座榴花媚侵衣艾葉香  
追思當日事賜扇沐  
恩光

夏日臥病村居

幽棲仍臥病終日掩柴扉  
竹圃鶯啼倦苔堦客到  
稀松風清入幕梅雨積沾衣  
向晚諸僮僕西郊種  
豆歸

秋日寄高大參省丈

當年銓署竝為郎此日天涯各一方  
鴈度吳江秋色遠思君不見斷人腸

夏日胥江送客

載酒餉行客江城水拍堤  
鳩呼山雨急龍出澗雲迷  
舟向天涯去帆從樹杪移  
自憐嬰世網不得遂幽棲

贈別張郡理應召北上

英妙終軍蚤棄繻吳中佐郡日  
懸魚秋風祖道仙蹤遠滿路棠陰拂使車

贈別張明府二絕

三載羈栖枳棘叢徵書遠下建章宮  
雙鳧飛向雲霄去花縣春來祇自紅

長洲苑外動征車去後琴堂月色虛  
他日懷君無可問試從江水覓雙魚

獨酌

扁舟移海曲獨酌坐蓬牕地僻人行少  
天高鶴去雙擢歌聞別浦帆影落清江  
俯檻時長嘯雄心未肯降

途中七夕

七夕今宵是時將溽暑收人間青女月  
天上白榆



秋金井梧飄葉銀河月墜鈞吳城方乞巧幾處倚  
南樓

紫薇花爲風雨所傷

庭花爛熳十旬紅絕勝春英二月中底事夜來風  
雨惡胭脂零落粉牆東

秋晚過城南別業

不到城南久秋風動草堂空堦梧葉墜別院桂生  
香鳥跡侵書牖蛛絲遶屋梁水亭清晏處隨意引  
壺觴

十四夜與方司訓金進士臨水翫月

翫月秋將半銜杯夜欲分瑤臺凝湛露碧落斂微  
雲魄湧中流影輝成五色文主人先客醉談笑未  
全聞

北寺中秋夜感舊

憶昔曾從此地遊月明如水正中秋雲消塔影當  
空落風送天香滿院流一瞬忽驚同輩少重來猶  
喜舊僧留當年風景依然在湖海馳驅欲白頭

贈別宗給舍同年二首

話別移孤櫂江鄉秋色深風帆行客思杯酒故人  
心波漾殘霞影山銜落日陰醉餘將綠綺誰復是

知音

仙客去京華歸期正及瓜天高  
溫省樹秋老禁園花擬向青蒲  
伏寧爲白筆誇頗思同志者潦  
倒在天涯

東樓曉起

小樓人靜夜冥冥庭樹秋高玉  
露零獨臥鴛衾偏覺冷半牕殘  
月酒初醒

送丁明府同年之任陽信

江湖秋水闊載酒餉丁鴻客去  
青天外帆飛落照中琴堂吟夜  
月花縣領春風別後思東魯絃  
歌處

處同

月下復抵婁城燈下獨酌

長嘯篷牕興頗濃燈前獨酌自  
從容寒潮向晚迴青海皓月通  
宵挂玉峰風度疎林聲淅淅煙  
籠衰柳影重重夜深鼓角城邊  
起醉夢虛疑長樂鐘

贈別馮進士之任海陽

江鄉水遶闔閩城歲晚憐君嶺  
外行萬里風塵緣五斗一帆煙  
雨動雙旌路經梅嶺花爭發秋  
向琴堂月正明聞說潮陽近滄  
海鱷魚應避使君清

曉渡漕湖

陰雨三冬後湖田一望平風生帆勢疾日出浪花  
明野鶴摩霄迴沙鷗狎水輕篷牕獨凝眺坐覺晏  
然清

雨牕與客夜話

一局殘棋夜未央寒牕風雨客聯牀靜聽簷溜和  
愁滴閒剔燈花引話長村巷煙昏鴉滿樹湖田水  
汎鴈無梁何人肯倡蠲租議躍馬馳封入建章

曉起與客同汎琴川

蚤起乘殘月相攜有故人共登青雀舫遠過白鷗  
津海色侵牕曙霜華拂袂新坐忘軒冕慮落魄任

吾真

鯤溟先生詩集卷一

鯤溟先生詩集卷二

吳郡郭諫臣子忠著

甥韓世能

男元夔

全校

五世孫鸞重刊

月夜東歸

雀舫乘潮發搖搖日暮歸入春新釀熟漸老故人  
稀臨水心如洗看雲思欲飛停舟天漸暝月色映  
荷衣

春日約方司訓同看梅花

不見故人久悠悠繫我思每當明月夜正是憶君

時野寺梅初發官橋柳欲垂扁舟共清賞幸不負  
幽期

春遊靈殿寺

野寺梅開後蕭條客到稀白雲當戶滿香雪繞空  
飛荒蘚春來合殘僧日暮歸為言狂稅苦終日掩  
柴扉

訪金文學次韻題壁

故人喜我至對客摘園蔬石鼎時烹茗風簷自展  
書君今同隱豹子愧未焚魚別去柴荆掩窗前月  
色虛

春日方司訓過訪留西館夜坐

佳客山中到蘭橈溪上停開軒酒正綠握手眼俱  
青笑語風生席酣歌月滿庭更闌望牛斗遙引少  
微星

春日過金橋訪友留飲題壁

攜舟閒過陸渾莊繞路名花雨後香十里暖煙迷  
竹塢一篙春水沒魚梁座傾村釀因留久盤摘園  
蔬引話長自是主人能愛客花前同取醉餘觴

春日與王比部陳考功虎丘敘別

勝境頻移棹良朋喜盍簪雲房時送客花徑暫停

魚...言集卷二  
二  
驂萬木春藏寺諸峰晚護嵐相逢此清賞具美盡  
東南

暮春日與客同登虎丘西閣

高閣倚巖西層軒落翠微一簾殘雨盡千頃暮雲  
飛天晚鳥將倦春深花漸稀移樽續勝賞潦倒頓  
忘歸

春夜步月口占

春雲輕護月香霧煖浮空院鎖鶯花夕林吹燕麥  
風酒憐樽易罄詩苦句難工寒食來朝是村村送  
落紅

邨居

抱病連朝未破顏柴門花落晝常關呼童掃室焚  
香坐消受村居一味閒

水南別業

日長庭院午風微春遠柴荆客到稀久雨園林花  
亂落新晴簾幕燕初飛門臨綠水堪垂釣坐對青  
山欲振衣屈指當今遊宦客重重甲第幾人歸

夜泊南橋移樽橋上翫月

湖上風生席帆收月滿船橋臨芳樹杪酒送白雲  
邊春老花將盡宵分客未眠故人同話舊潦倒醉

青瓊

春晚同登惠山

花落清明後扁舟載酒來山從一徑入寺遶萬松  
迴池上泉聲細樽前暮色催杖頭錢未罄沽取盡  
餘杯

春日宴宮詹吳公園亭

湖上停蘭櫂仙源此地逢徑幽羣樹合雨過百花  
濃池閣風鳴樹家山雲護峰笑談方竟日明發且  
從容

夜發陽羨

信宿名園裏揚舲出義興春寒頻對酒夜雨獨挑  
燈遠信時同鶴孤眠近類僧歸途風正好竟夕到  
毘陵

丹陽與家兄弟舟中敘話

江郭移孤櫂時逢穀雨新鶯花三月暮燕麥萬家  
春野店沽村釀行廚薦渚蘋謝家兄與弟客路更  
相親

雨後中庭夜坐

槐庭秋雨霽正是納涼時雙闕銀河近千林玉露  
滋興隨清夜發坐為好風移此意無人解唯應達

者知

遊昌國寺

古寺空山裏危樓積翠邊講堂凝法雨茶竈散炊  
煙樹引游絲住風隨落絮顛僧家方午餉抱甕汲  
清泉

晚登大茅峰

西日斜懸句曲峰中天削出玉芙蓉雲歸絕頂迷  
春岫煙起深林翳晚鐘怪石巖前蹲虎豹長松澗  
底走虯龍臨高遙向金陵望王氣千年正鬱蔥

自茅峰回赴丹陽

春山青不了回首望空迷落絮黏蛛網殘紅逐馬  
蹄人行香霧裏路轉畫橋西爲阻連宵雨遊人半  
未齊

贈孔曲山秀才

稚圭高臥曲山陽千載移文日月光燕雀未知鴻  
鵠志羽翰一任海天長

毘陵別伊儀部同年北上

春風一棹過毘陵握手息息別恨增我欲南還君  
北上夜深篷底獨挑燈

上巳日與客同登虎丘二首



連朝伏枕因中酒此日登山更舉杯芳草已從香  
徑合殘花猶傍暮春開日臨山色當樓滿風度泉  
聲曲澗迴自是遨遊興成癖扁舟湖上許重來  
劔池春色綠沾衣把酒登臨入翠微幾處歡呼追  
勝賞一番歌舞竟斜暉鶯藏琪樹間關語燕逐楊  
花高下飛上巳風光時正好共君潦倒未須歸

贈王儀部同年分巡東浙

胥江春雨後送客剡溪遊帆向天邊落舟從樹杪  
浮越中新憲節吳下舊風流遙想山陰夜高情屬  
子猷

池亭月夜遲客不至漫興

山公池上月澄霽似中秋深樹煙初歇晴空水欲  
流美人期不至華館自淹留獨酌仍多興狂吟倚  
崩緜

雨中登蠡東水閣

雨洗園林潤風生水閣寒池荷初起蓋籬筍漸成  
竿曲檻臨花外高窗隱樹端閒來此登眺頓覺眼  
前寬

山中逢人道姓名因口占一絕

春去猶乘雀舫行晚山罨畫半陰晴投閒此地頻

來往休訝山人識姓名

蠡東別業

青郊開別業綠水抱孤村  
旭日雞豚散芳春竹樹  
繁苔侵蔣詡徑雲護辟疆  
園鄰舍香醪熟還聞夜  
扣門

舟中晚眺

涼風天末起湖上送歸橈  
返照和煙暝殘紅帶雨  
消孤村時吠犬深樹已鳴  
蜩坐看東山月相將不  
待邀

城歸喜雨

晨出望齊門舟前水氣昏  
遠山雲似墨近郭雨傾  
盆雷電連空起蛟龍出海  
奔山農俱滿望乍舞徧  
郊原

池亭雨後

華館開林末新涼生雨餘  
荷香飄座遠山色逗窗  
虛避俗千竿竹消閒滿架  
書連朝厭城市來此稱  
幽居

夏日放舟過蠡東別業

揚舲過蠡口言往習池遊  
竹徑紅塵遠柴門綠水  
流一樽時遣興竟日可消  
憂坐久涼風發林塘六

月秋

看童子種豆

倚簷時藝豆插竹便成籬  
蔓引清風入花凝曉露  
滋先秋涼瑟瑟帶月影  
離離相對茅茨下幽居興  
在茲

夏日書齋二絕

香消日正長蟬鳴夢初醒  
睡起立空堦梧桐落清  
影  
苦暑忘冠履消閒對弈棋  
綠陰滿牕戶正好納涼  
時

池亭望雨不至

江鄉千里旱處處桔槔聲  
樹底蟬鳴晚簷牙鵲噪  
晴疾風吹雨散落日照川  
明隴上農家子難禁悵  
望情

蠡東書舍即事

清溪抱村落深樹鎖煙霞  
客至開三徑閒來共五  
車涼生蒼玉簟風落紫薇  
花向晚逍遙坐池臺月  
色賒

江邨雨後

山雨朝來溼滿城郊原無復桔槔聲  
石牀雲過琴

書潤水檻風生枕簟清林駐淡煙迷竹樹溪浮新  
綠遶柴荆蠡塘數里荷花發還擬扁舟弄晚晴

早秋日書舍

掃  
槐庭日正長梧院秋偏早風落紫薇花滿地無人

早秋日遊王比部園亭

摩詰城南第名園枕曲流竹林堪避暑梧院早知  
秋掃徑苔痕破開簾樹影浮蘭樽同笑語竟日此  
淹留

穆宗登遐書感

聞說君王棄萬幾孤臣千里淚沾衣鼎湖此日乘  
龍去蜀地何年化鳥歸曉兔空從金殿落秋螢時  
向玉階飛遙知弓劍橋山畔曙色蒼茫薤露微

邀方司訓同往蠡東別業

已下迎徐榻言遲訪戴舟孤村禾黍晚數里蓼花  
秋且莫歸青嶂還來看白鷗百年能有幾寧惜片  
時留

秋日方司訓過訪二首

雨過園林後新涼滿樹梢勞君攜杖履訪我扣衡  
茅水檻橫漁艇松門隱鶴巢故人同笑語塵網暫

時拋

地僻少來客居閒時不冠孤亭浮水面喬木上雲端雨滴琴樽潤風清枕簟寒呼僮繫君馬信宿且盤桓

早秋日與客遊虎丘

古寺空山裏聊因避暑來路從松下入門向竹間開深樹蟬聲集層軒鳥道迴相將孤月上樽酒許重陪

仰蘇樓晚眺

高閣憑虛起重闌俯翠岑客來原有約雲出自無

心黃葉凝秋思青松礙日陰北牕天欲雨涼氣坐來侵

池亭晚霽

江皋初雨霽涼思襲荷衣喬木生靈籟孤亭送落暉波翻菱葉亂露泣豆花肥苔徑閒來合應知過客稀

東樓晚眺

散帙倚東樓川原一望收蟬鳴黃葉寺荒下白蘋洲落日青山外西風古渡頭江鄉景堪愛禾黍萬家秋

池上新構小齋

誅茆營小構面水敞晴軒俗駕時堪避清陰日正  
繁開簾看竹色涉徑破苔痕客有知音者頻過不  
厭煩

晚泊松陵

掛帆過笠澤艤棹問鱸魚古寺垂楊裏長橋荒蘚  
餘煙雲秋壑冷水月夜船虛釣雪灘邊路他年擬  
卜居

嘉禾道中

觀潮緣久約放櫂復乘閒片雨嘉禾外孤雲笠澤

擬還  
間捲簾看綠水把酒對青山雅性耽清賞扁舟未

崇德道中喜晴

久雨初開霽天垂別樣青風生秋水練雲斂暮山  
屏疎柳官橋路寒花古驛亭遨遊此乘興相對酒  
俱醒

舟中晚眺

湖上西風錦纜開晴沙白石水縈迴蓼花洲轉河  
橋曲落日漁舟蕩槳來

八月十六日與客同遊西湖

芒屨同上泛湖船萬頃波光一鏡圓日映諸峰浮  
水面雲扶高塔倚山巔幽花曲渚橫秋色疎柳長  
堤起暮煙準擬今宵明月夜與君潦倒不須眠

謁和靖祠

同上釣魚艇閒登放鶴亭祠臨秋水碧湖帶遠峰  
青荒砌多苔蘚喬松長茯苓遐哉林處士千載仰  
儀刑

江上觀潮

昨泛湖中棹今登江上臺忽驚滄海內遙駕靈山  
來勢比行天馬聲疑奮地雷鯨翻渤澥動龍激禹

門開汜濫江湖溢奔騰天地迴黃雲凝未散白鳥  
駭飛回不是瞿塘峽虛浮濫瀕堆難忘越人恨空  
抱伍胥哀弔古應多賦臨風愧不才

謁岳廟一首

曾於青史想容儀此日登臨過古祠壯志未忘吞  
北北忠魂猶自倚南枝矢心天地圖恢復唾手燕  
雲在指麾千載英雄常涕淚金牌何事即班師

秋日同王僉憲劉大叅遊石屋洞天仙臺

長松十里路盤旋石屋深藏古洞天林下諸僧閒  
白日空中孤鶴下蒼煙青山社許陶彭澤丹竈砂

逢葛稚川最愛曲江花裏伴一樽潦倒白雲邊  
遊飛來峰

中天飛下青芙蓉峭壁巉巖千萬重仙境霞明金  
錯落洞天雲露玉玲瓏古藤亂繫將崩石老檜雙  
扶欲墮峰海上三山何處是恍然此地或相逢

舟中寄貴州滕憲副同年

憶昔同為選部郎可憐別後各參商一封書寄南  
飛鴈萬里隨風到貴陽

秋日過雲間謁少師徐公

江鄉秋色滿東籬相國歸來鬢已絲試問華亭明

月夜鶴聲誰似漏聲遲

舟發雲間

曉發雲間驛風生水國秋潮痕平兩岸帆影漾中  
流共泛杯中蟻閒看水上鷗何時脫塵鞅蝦菜五  
湖舟

舟中晚眺

落日低沉閣殘霞倒浸江輕帆晴片片歸鳥暮雙  
雙酒興隨時發詩魔未肯降閒心對流水獨立倚  
篷牕

千墩曉發



殘酒初醒後江天欲曙時雞聲催棹發月影逐帆  
移湖海牽遊興家園入夢思芙蓉花正好似與主  
人期

崑山晚歸

崑山猶在目挂席又唯亭湖外蘋花白霜前楓葉  
青檣烏隨落日水鳥下寒汀歸路天將暮柴門半  
未扃

送蔣祠部出守高涼

南宮初出守萬里駕星軺報國丹心在辭親白髮  
饒高涼日漸邇炎海瘴應消握手難為別知君嬾

折腰

重陽日與客池亭小飲

江鄉逢令節攜酒醉重陽楓葉經霜變芙蓉近水  
芳淡煙生竹塢宿雨暗池塘檢點年來事園林日  
正長

秋夜書齋獨宿

澤國秋將盡書齋夜欲分孤燈懸壁照落葉隔窗  
聞啼月烏栖樹隨風鴈入雲寒衾清不寐耿耿惜  
離羣

雨中登蠡東水閣

水閣初冬候閒來時獨登雨中聞藥臼林末掛漁  
罾苔暈侵窗長茶煙傍竹凝臨風思無限寂寞曲  
闌凭

雨後登樓晚眺

雨洗塵氛盡風高朔氣侵凝眸時遠眺抱膝更長  
吟浩蕩乾坤闊淹留歲月深飄然生遐想千載達  
人心

月夜同諸友小集二首

空林懸片月良夜步清溪野渡煙初起寒原燒欲  
迷犬迎羣客吠鵲遶一枝棲對景偏多興蘭樽月

下攜

寂寞書齋靜柴門喜客過開樽還旅坐對月起高  
歌樹影當堦亂霜華拂袂多酒闌賓客散試問夜  
如何

城中夜歸

江郭寒鴉暝蓬牕暮色催孤舟連夜發數里帶星  
回燈火沿村起柴扉逐水開草堂人未寢相對共  
銜杯

晚泊震澤

宴罷司空宅舟迴笠澤濱霞明雞悞曉沙白鷺迷

津蝦菜湖鄉味羊裘客路貧蓬牕閒立久月色正  
宜人

曉發磧礪枕上口占

殘酒初醒後寒燈欲滅時霜飛蓬戶早月落戍樓  
遲未解聞雞舞徒興夢鹿思詩成還穩睡此意少  
人知

蠡東書館寒夜有懷

別業三冬後書齋五夜長風搖銀燭影火燼玉爐  
香古木烏棲月晴空鴈唳霜寒衾人獨寤耿耿憶  
鵷行

除夕二絕

澤國今宵歲欲除小齋無寐獨躊躇朝來天子新  
開曆還見春風到草廬

抱戚江鄉六載餘燈前驚歎二毛初平生多少風  
雲氣竹帛勛名半已虛

柳枝詞四首

陌上絲絲帶雨微遙知春傍柳條歸一年一度常  
如此昔日章臺今已非  
嬈嬈柔條鎖翠煙隨風亂舞綠牕前楚王宮裏人  
多少如此胷肢亦可憐

雨織金絲綠未敷，隔牕偷眼看模糊。畫眉京兆今何處？試問雙眉得似無？  
河橋青眼競窺春，淡著煙光別樣新。留却長條休浪折，春來多少遠行人。

早發南行口占

澤國春寒花事遲，行人臨發又愆期。今朝放棹梁溪去，處處東風颭酒旗。

舟中晨起

破曉船爭發，日高人晏眠。因酣吳市酒，思煮惠山泉。鳥去青雲外，帆飛綠水前。終朝困塵網，到此獨

悠然

夜宿白土酒家

日落半山陰，倉忙過客心。車徒投白下，燈火近青林。肆列春盤細，杯添夜漏深。兒童進新茗，端可滌塵襟。

路傍折梅戲占

肩輿屈曲傍山蹊，折得梅花手自攜。蜂蝶也知春意，在隨車直過畫橋西。

春日留都

久脫朝簪伏草萊，投閒今上鳳凰臺。馬前雙闕連

雲起天外三山聳翠來好鳥偏從名苑集奇花多  
向上林開六朝舊事今何在欲踵風流愧不才

途中寫懷東董司空劉光祿二省丈

潦倒江鄉數載餘姓名久不到公車幸承季布千  
金諾更得劉公一紙書長揖昔曾容汲黯倦遊今  
已老相如饒君肯假吹噓力淺薄那能賦子虛

途中有懷靈殿寺梅花三絕

野寺梅開千樹花風飄香雪點袈裟自憐清賞難  
消受偏到開時不在家

古殿荒涼梅正繁春風花滿給孤園主人底事忘  
歸去誰遣清香撲酒樽

二月江鄉已落梅飛花散作白雲堆且拚醉臥山  
窗下疎影還從月下來

雨後登虎丘

蘭舟維細柳與客共攀躋山靜花爭發林深鳥亂  
啼羣芳含宿雨雙屐怯春泥杯酒論心久危闌日  
已西

春日過城南別業

放棹城南日未斜雨餘百卉競春華迎風弱柳垂  
金縷近水天桃漾錦霞魚藻輕翻浮別沼燕泥頻

掠過東家生逢佳景須乘興莫遣香塵汗落花  
清明日舟次邀方司訓同往西山  
寒食江村路門多插柳條市呼新釀熟客喜宿醒  
消雨洗山光潤風生花氣饒故人原有約沙際一  
停橈

宿西山谷

落日青山下停舟共訪僧雲低簷外塔香繞佛前  
燈野曠泉聲遠春和花氣蒸偶然逢二妙還許聽  
三乘

朝發古菴

雞報山窗曉時驚客夢殘蒲團迎日色羅袂怯春  
寒清磬和雲落繁英帶露看舟行更回首高塔出  
林端

登七十二峰閣夜宿顧山人家

聞說桃源萬樹花遨遊端為惜春華煙霞深閉仙  
人宅魚鳥偏鄰處士家湖面流光浮日去山圍斷  
處倚雲遮杖頭剩有青蚨在綠酒頻沽不用賒

飲陸啓孫含青軒和方司訓韻

地據湖山勝誅茅結小亭簷前芳草綠座上遠山  
青花月春遊倦茶煙午夢醒蟠螭來較晚香墜錦

雲屏

寒食飲楊氏宅

佳節偏多雨荒村入禁煙  
烏啼歌扇外花落舞筵前  
香霧侵衣薄微風入座偏  
主人能勸飲相對共陶然

登虞山望湖亭

湖霽浮銀鏡山圍列翠屏  
層臺臨拂水曲澗似蘭亭  
鶯語巖花媚龍歸洞草腥  
危闌羣勝集獨坐酒初醒

蠡東前園即事二首

春園門久閉入徑薜蘿封  
林駐茶煙細衣沾花露濃  
水邊雙白鶴檻外數青松  
對此幽閒境頻過意未慵

地僻塵氛遠池晴水竹分  
孤亭明夕照列樹暖春雲  
戲蝶懸蛛網遊魚避鴨羣  
晚來花下坐漸覺酒微醺

澱山湖中

曉起進蘭橈東行水國饒  
湖連天共遠日出霧全消  
獨鶴凌風舉羣鷗逐浪飄  
柳村看漸近青幔映河橋

舟次唐行

江鄉逢暮春一棹艤沙濱客路看飛絮行廚薦綠蘋冠裳時暫遠魚鳥漸相親長嘯乾坤裏悠然著此身

曉發大寺鎮

孤村雞報曙遊子動歸橈河帶明星落煙迎旭日消地卑多近水湖曲不通潮野店香醪熟侵晨向客招

沙湖舟行

昨送春歸去今從湖上來殘雲隨雨盡遠浪拍天

迴水鳥驚人沒汀花向客開閒來心境寂無復著纖埃

池館新晴

園林新雨霽嫩綠壓枝繁戲蝶穿花舞游魚出藻翻清香凝曲檻佳景落幽軒獨坐無人到惟聞鳥雀喧

夏日園居寫懷

園徑頻看趣自成蕭條終日掩柴荆池邊久立諳魚性樹底閒行識鳥聲雨過林梢凝斷靄夕陽霞彩弄新晴且將疎懶荒村臥浮世誰憐阮步兵



崑山晚歸漫興

百里崑山道歸舟趁晚風霞明千嶂外日落五湖東未獲隨仙仗還堪學釣翁深源真可笑忽忽自書空

夏日園居諸親友見訪

幽居掩蓬戶端足避塵囂對酒顏仍破開軒興自饒風生香漸遠水近暑潛消故舊攜棋局林間不待邀

晨起遣興

山牕雨過動微涼對鏡俄驚鬢髮蒼堪歎浮生苦

無幾漢庭空自老馮唐

夏日過城南別業

肩輿久不到城南此日投閒一駐驂近水亭臺宜落景隔離花竹映澄潭窗間遠岫來空翠雨後長天正鬱藍便欲攜家同此隱爐香茗椀事幽探

東宅漫興

宅傍青郊曲盤旋竹樹幽石梁空待月池館更宜秋雲拂堦前樹風清水上樓閒來時嘯傲坐覺暑潛收

送馬憲副同年之楚

昔日看花曾作伴  
今晨把袂若為情  
欲知此後相思處  
黃鶴樓前片月明

送錢秀才兄弟應試

吳越神明胄  
相看盡白眉  
共乘木蘭舫  
期折桂花枝  
鄉國凝眸處  
都門燕喜時  
君家兄與弟  
靜聽鹿鳴詩

登上方寺

路入楞伽寺  
明湖映遠峰  
兩崖松檜合  
一徑薜蘿封  
亭逼青霄近  
林藏綠蔭濃  
開樽共吟眺  
煙樹暮重重

行春橋翫月

臨湖維短棹  
天末起涼風  
皓月飛銀鏡  
長橋偃玉虹  
望中煙翳景  
席畔水涵空  
勝會知難再  
酣歌意未窮

新秋夜坐

小庭賓客散  
獨坐更移時  
西嶺雲生巧  
東林月上遲  
蛩聲鳴亂草  
螢火照疎籬  
虛館清秋夜  
幽懷只自知

蠡東晚歸舊宅

薄暮客西歸  
舟行載夕暉  
亂蟬悲露切  
宿鳥渡煙

微秋水逾明鏡殘霞似畫衣停橈天漸暝一犬護  
柴扉

晚發華亭

向晚蘭舟發人牽錦纜行日穿雲竇破溪接海潮  
平映水帆檣影投林鳥雀聲開簾下堦拜遙想故  
人情

舟次嘉善縣漫興二首

江郭憐孤往西風灑客裳雨晴林葉潤日煖稻花  
香白髮催年邁滄洲引興長鱸魚秋正好歸思不  
能忘

返棹孤城下輕雲近女牆  
槿紅初過雨橘綠未經  
霜景物看來變浮生祇自忙  
馮唐真易老白首尚  
為郎

夜泊嘉興城同年戚符卿過訪

訪舊嘉禾郡城頭暮色催  
水邊孤艇泊燈下故人  
來惠我多新句酬君愧不才  
何時重放棹同上越  
王臺

吳江道中二首

雨後松陵道西風吹布袍  
帆飛秋水闊鴈度暮雲  
高野店乞殘火行廚進濁醪  
微吟殘照裏獨坐檢

離騷

揚舫過笠澤回望是姑蘇驛路分南北煙帆半有  
無孤城臨巨浸平野插浮圖今夜長橋月清光映  
玉壺

中秋晚過虎丘

蘭舟初雨霽正值暮鐘時酒爲藏闔醉棋堪應劫  
遲煙迷蘭若寺露冷桂花枝月出雲還翳空辜石  
上期

早發冶場涇

客路宵分後茫茫煙景迷孤舟行載月數里未聞

雞白露侵帆溼明河向水低棹歌驚夢斷已到蠡  
塘西

遊桂嶺

西嶺千年桂陰森入翠微瓊枝雲外綠金粟雨中  
肥影落浮杯酒香飄襲客衣當年和露折曾向廣  
寒歸

贈碧峰上人

古刹深山裏幽棲獨旻公三乘聞已悟五蘊本來  
空止水禪心似孤峰色相同蒲團深歲月龕外雨  
花紅

遊天池

穿雲躋碧嶺遙望近丹丘雨歇金蓮霽煙涵石屋  
秋樓臺開絕境花竹映清流紅葉蒼山暮停車為  
爾留

出山

昨朝遠赴野人期短棹琴樽帶雨移山閣煙霞秋  
霽後法堂燈火夜深時竹間共喜高僧話石上慚  
無幼婦詞桂嶺天池耽勝賞舟人休訝出山遲

竹梧書院晨起

日高三丈遲遲起闌干曲曲人頻倚秋風落葉滿

庭除呼童掃葉收梧子

贈伊母太淑人

堂上萱花歲月長堦前蘭玉競芬芳南宮仙吏稱  
觴後雙袖猶沾粉署香

送近岡吳太守入覲二絕

天皇出御未央宮萬國衣冠入覲同借問循良誰  
第一漢庭無復過吳公

滿路吳民起頌聲願言借寇向承明春風三月棠  
陰下多少兒童竹馬迎

送長洲陳明府入覲

朔風吹袂冷鞍馬去京師天外雙鳧遠雲中一鶴  
隨賦先羣邑起績報九重知花縣歸宜早徵書漸  
及期

夜泊嚴墓鎮燈下聞歌

客路黃昏後移舟近釣磯夜長頻剪燭露冷欲添  
衣桑落浮杯綠車螯入饌肥醉餘聞妙曲響遏白  
雲飛

吳江道中

言返嘉禾棹時過釣雪灘平湖環縣霽高塔入雲  
寒沙岸蘆花白霜林楓葉丹開簾看旅鴈點點落

江干

邨晚

細雨孤邨暮呼僮扃竹扉牀頭新釀熟座上故人  
稀野寺昏鐘起煙林宿鳥歸有懷清耿耿簷外片  
雲飛

冬日與客遊西山

孟冬風日煖與客共登山一嶺界天上諸峰隱樹  
間茶花隨地白霜葉滿林斑回首天將暮僧從落  
照還

舟發婁門夜抵崑山

揚舲過湖曲沽酒近唯亭婁水浮煙白崑山擁縣  
青亂鴉棲暝樹飛鳥下寒汀夜傍漁舟宿時聞蝦  
菜腥

送陸春元北上

閩闔風生白鴈高征人寒擁赤霜袍羨君北上陳  
三策愧我南來漸二毛剪燭夜傾桑落酒揚帆時  
度廣陵濤看花上苑春將近不惜臨行贈佩刀

金閩送別晚歸

金閩時送別落日照清樽山近雲常繞天寒水易  
昏鴈迷千嶂雨犬吠數家邨歸路休言晚嚴城未

掩門

胥江送陳明府入覲兼寄申王韓三內翰

二首

送客胥江別微茫煙景分舟前見新月天際斂輕  
雲夙有林泉興慚無竹帛勲封書寄朝貴應念久  
離羣

數載江鄉臥曾無政府書未須嗟失馬久已願焚  
魚嘯傲乾坤闊優游歲月徂故人俱侍從肯憶病  
相如

蔣雲涯太守自高涼入覲因歸省吳中賦此  
為贈

嶺外風塵暗百蠻今朝喜得故人還畏途潦倒心  
猶壯炎海驅馳鬢欲斑歲晏衝寒朝魏闕夜深飛  
夢繞吳山歸期屈指春將暮三徑花開白日閒

城中夜歸

日落歸心促天高朔氣凝月明寒渡水煙白夜船  
燈疎懶真堪棄脂韋素未能拙哉蕭狷叟垂老乞  
為僧

晨起得起官報

懶性甘終棄除書忽漫傳陽烏分樹杪晨鵲噪簷  
前地忝銓衡重心慚水鏡懸皇恩真浩蕩舒眼望

青天

晚過天平嶺

數里天平嶺崎嶇石路遙孤雲倚絕壁萬笏擁層  
霄嵐闊衣偏薄寒欺酒易消肩輿歸漸晚落日在  
林梢

早發青浦

五夜溪塘風雨聲水村雞唱漸天明數杯濁酒醉  
初醒一枕黃梁夢未成篷底捲簾看日出沙邊解  
纜趁潮平揚帆遠向雲間去極目煙江無限情



鯤溟先生詩集卷二

平登青嶺

登巖閣不雨新寒

樓里天

朝登天平

青天



